

欽  
定  
全  
唐  
文

欽定全唐文卷四百十九目錄

常哀十

故四鎮北庭行營節度使扶風郡王贈司徒馬公

神道碑銘

承天皇帝哀冊文

貞懿皇后哀冊文

冊諡承天皇帝文

故開府儀同三司上柱國贈太傅信王墓誌

奉天皇帝長子新平郡王墓誌銘

信王第七子贈太常卿鄴國公墓誌銘

華州刺史李公墓誌銘

滑州匡城縣令楊君墓誌銘

欽定全唐文卷四百十九

常袞<sup>十</sup>

故四鎮北庭行營節度使扶風郡王贈司徒馬公

神道碑銘

皇帝使常侍以故征西扶風郡王臣璘功行之錄詔門下  
侍郎平章事臣袞曰古諸侯大夫計功稱伐書於太常勒  
之彝器德勲高故其文懿事業實故其言遠有國之大經  
也納忠於王室豈袞紀之禮闕歟宜文其頌聲以昭示承  
休於豐碑焉臣謹按司勳之戎籍史官之年表而敘之云

聖人稽黃虞之道以武功文德統御天下赫赫明明罔不  
率俾唯犬戎自擅寇於我西土而猶懷以威德久而浸驕  
時乃大稽命將考之令典惟三年夏六月庶邦百辟洎侯  
王列將咸會於明廷乃大誥於爾在位有能興我西師僉  
曰璘哉是用詔以鷹揚之命於夏有鸞旂琫戈之賜公拜  
手稽首不敢辭難遂帥師朝那弭節涇流恢耀武威以臨  
於戎狄既至乃以戎服立於軍門之外奉敷天子之威命  
而訓於將軍列校六正五吏三軍之大夫曰惟昔盛明必  
有憂難其在殷高宗也有鬼方之征其在周文祖也有昆

夷之患秦以安定北地戎狄內侮漢以金城隴西氐羌入寇故遣率以守衛中國修戰而高尚武力國家道德盛於殷周甲兵雄於秦漢亦有邊患尚勞睿謀則疆臣之罪也將何以塞責誓將上奉神武之算下憑戎士之力鼓行而前殄殲羣慝詞情抗厲風雲動色於是舉軍法以誓之令簡而一衆畏而服雖嘍喑老將聞而悚然乃周覽其山川以備其戰守有若犀兕其威驅駟其勇屹立而不動者持重之將統焉禦於水碇之衝蒙輪超乘縵胡突鬢眈眈而橫奮者雄毅之將董焉捍於瓦亭之陰輕軒飛翰闐闐桓

桓隸於射聲校尉以出松谷百夫之特萬人之敵屬於車  
師後部以殿銅城火渠門之旗舒於大回川雷密須之鼓  
殷於都廬山周之以木樵校聯布之以蘭石渠答部勒旣  
定天地肅然遂使魁健氣索猛驚魂駭卻略引去不敢近  
塞故八年之間再寇而已此皆親稟審略協用武經前後  
獻功悉如宸旨方將大復流沙遠收故地奪我良將罔卒  
西事以大厯十一年月日薨於戎府春秋五十六天子廢  
朝而歎曰安得雄邊威敵之臣如扶風乎遣中命以迎喪  
顧近侍而流涕其至第也百官會弔其遺奠也五校啓行

贈以車馬含有貝玉所以褒大勳也初公自二庭統甲士  
三千赴鳳翔行在遂陳滅胡之策先皇帝奇之曰吾無憂  
於東方也遂戰青渠陣澧水收二陝復三川衛南以百騎  
破五千河陽以一旅摧十萬史朝義悉師自將大戰邛山  
國家以天下勁兵夾攻未動公獨率所部不陣而馳偃旗  
先登闕如虓虎鬪酣披靡橫貫而出迴戈奮擊虜陣始破  
交突數合轟然大潰時副元帥太尉光弼壯之曰吾用兵  
三十年未見以少擊衆雄捷之若此每有征伐大計悉咨  
訪焉斯亦羣帥之傑旣而移軍右輔疾援河西固已離之



心存將棄之地及聞僕固懷恩之變卽日旋師萬類千羣  
延蔓山谷輕行轉鬪虜殺而歸屆於岐都寇已四合公乃  
持滿外嚮全入懸門未及解甲背城出戰戎師北走數騎  
前追背血橫灑朱殷金甲禍戟而墜應弦而倒者數千萬  
人可謂三軍之絕也至於理鄭國撫潁封化郇邠寧上郡  
勤於藩職惠於長人勞徠流庸瞻恤孤老縑綜綿續工於  
織紵入而有制故大東之刺不作禾麻菽麥業於播藝用  
之有節故自北之化可懷此又列郡之率化也公字某扶  
風人也自秦漢至於國朝公卿大將軍通侯二千石踵武

王室休有烈光曾祖昭朝散大夫新豐縣令祖正會右威  
衛將軍扶風郡公贈光祿卿父晟左司禦率府兵曹參軍  
贈太子少保忠孝在門文武繼代宦婚之盛士族有耀惟  
公勲胄華茂雄姿高爽少有四方之志以才氣自任擺落  
凡格不嬰細微故弋獵畋漁嘯咤川澤年二十讀伏波傳  
至大丈夫當於邊野以馬革裹屍而還慨然而歎曰豈使  
吾祖勲業墜於地乎由是憤憤邊戎徘徊孤劒遂西至絕  
域以奇功累授裨將歷金吾將軍殿中監太保御史中丞  
遷御史大夫領北庭行軍使邠州刺史加工部尚書節制

涇原以鄭顥二州隸之尋拜右僕射知省事階至儀同進  
封異姓副軍以降略而不書以英明之識遇聖明之運故  
得竭其智謀極其任遇抗大節以激危難攄洪仁以庇傷  
殘公之理軍也以穰苴兵法孫子十三篇先以正合終以  
奇勝閒廊深邃應變無端與之安與之危故可合不可離  
同其敗同其成故樂死不樂生至於木罌濟河登山拔幟  
解鞍而臥鞭馬而馳兼之有餘亦不差異嘗以家財二百  
萬贍三軍與其散已食於行伍陳賜金於廊廡何相去之  
遠哉公之事君也奉之以實納之以忠造邾前籌詞理明

順檢身無過恭謹畏慎祿賜所加則受小辭大任使所及  
則履險讓夷以忠材而親重有絳侯之遇也以簡質而倚  
愛有吳漢之信也所謂國之神將朝之蓋臣終慶於家永  
於福祚鐘石享於祖考帶礪傳於子孫宜哉嗣子盱等重  
族之盛隸業承家哀哀執喪痛結天壤萬家葬地能誠昔  
賢十里邱封亦非遺志獲承君命欽率朝經請諡嘉名謂  
之合禮銘曰

峩峩雍城積高氣靈氣主金行良將乃生琅琅司徒雄略  
縱橫眈眈其視震震厥聲四方靜難二紀操兵初奮厥武

車師戎府鐵馬蛇矛大黃白羽天山瀚海歟薄風雨驍騎  
三千披荆謁主從我撫軍擊胡滅虜迴戈涼野解敵岐下  
烈烈英風橫飛西土遂佩玳瑁分雄檠戟寵臨方鎮迺蔚  
迺赫洪稜遐振虜氣外折惠化滂流人心內結昆夷先零  
白旆至涇受算宸扆朱旗撫征密陰前塞義渠故城邱巒  
陵谷遠近相屬澶漫傾合紆餘迴復野戰高秋金羈馳逐  
左揮右射虎捷神速番渠愕視百姓推伏國於扶風祚爾  
嘉庸位長庶僚雁行三公王用蕃錫我有鼓鐘叔父昆弟  
燕私邕邕功成身歿寵厚厥終周漢二宣皆有勞臣北征

西討出車麟麟今我司徒實同厥勲勲在王室光昭後昆  
承天皇帝哀冊文

維大厯十三年歲在戊午四月丁未朔六日庚子故齊王  
諡曰承天皇帝興信公主季女諡曰恭順皇后初天寶十  
五載會有國難王首建大議扈先帝於朔陞以其年八月  
薨於行在某年某月追封齊王今上親親念切冊贈大號  
以大厯十三年六月遷座於咸陽銀棨傳曙金根在馭出  
仙禁兮逶迤指橫橋兮西去乃詔禮儀使工部尚書祖冀  
於行宮禮也聖慈友愛痛結天倫爰命作冊授之儒臣其

詞曰

天祚我唐帝系其昌鴻明皇皇子孫保光長發其祥倬生  
賢王英華外揚五色含章聰敏明粹孝友純至文麗春華  
神清顥氣所全者德不有其貴昔在開元錫羨其蕃儲后  
愛子天皇弄孫勝衣趨拜卽啓東藩山委慶賚雲翔渥恩  
紫殿丹臺兮相屬臨洞窅窅兮沈沈聯日光以金支煒芳  
萼於瑤林甲觀宴兮承顏數寢門侍兮鐘愛深旣閑詳於  
占對亦自守於沖退忘外事之嬰拂服前言之箴誨謂歡  
娛之未更何艱否之相會雲雷邁屯闕洛陽塵乘輿南幸

定議北巡上戴君父協於天人中興之業實賴經綸如何  
上元不假之年丹誤金鼎尊空玳筵軫於震慟澤漏重泉  
東負蒼海錫其土田顧謀始之言博謂飾終之恩薄崇章  
大號自我天作賜梁國之旌旗用魯侯之禮樂備物宮庭  
巍巍寵靈寶符玉牒照曜青瑩仙駕帝儀上升紫冥邦媛  
之妹婦道不踰遠辭金屋久閉珠襦錫以象服合於鮒隅  
嗚呼哀哉出國門兮蒼山轉辭白日兮長安遠驚飈落於  
桂宮零露霑於蘭坂建翠鳳兮歲蕤瞻輅馬兮遲遲壽宮  
閉兮與天畢玉座深兮無曉時嬪嬙儼兮侍新寢鳬雁遊



今非故池戢神輝之杳靄結吾君之眷思唯鴻勳之不泯  
渺然終古今同斯

貞懿皇后哀冊文

維大厯十年歲在乙卯十月辛酉朔六日丙寅貴妃獨孤  
氏薨粵明日追諡曰貞懿皇后殯於內殿之西階十三年  
十月癸酉乃命門下侍郎同平章事常袞持節冊命以其  
月二十五日丁酉遷座於莊陵禮也素紗列位黼帟周庭  
輅升玉綴軒缺珠櫺皇帝悼鸞掖以追懷感麟趾而增慟  
備百禮以殷遣命六宮而哀送宗祝薦告司儀降收爰詔

侍臣紀垂鴻休其辭曰

祚祉悠久寵靈誕受元魏威藩周隋帝后五侯迭興七貴  
居右肇啓皇運光膺文母續女是因以綱大倫生知陰教  
育我蒸人瑞雲呈彩瑤星降神聰明睿知婉麗貞仁惟昔  
天監搜求才淑龍德在田葛覃于谷周姜晉宇漢后推轂  
王業惟艱嬪風已穆繼文傳聖嗣徽克令不曜其光乃終  
有慶祇奉園寢肅恭靈命越在哀榮聿追孝敬文織絲組  
朱綠元黃上供祭服以祀明堂法度有節不待珩璜篇訓  
之制自盈縑緗敘我邦族風於天下始於憂勤協成王化

慈厚諸女寵臨下嫁登進賢才勞謙日夜服繒示儉脫簪  
申誠訪問後言讌遊夙退內和羣娣動有矜誨外睦諸親  
泣辭封拜闕翟有日親蠶俟時忽歸清漢言復方祇萬乘  
悼懷羣臣慕思玉衣追慶金鈿同儀嗚呼哀哉去昭陽兮  
窅然乘雲駕兮何在人代宛兮如舊炎涼倏兮已改翠葆  
森以成列素旗儼而相待言從王兆之貞永閼瑤華之彩  
別長秋之西苑過望春兮南登招帝子於北渚從母后於  
東陵下土清兮動金翠外無像兮中有馮合簫挽以攢咽  
結雲雨之淒凝吾君感於幽期俯層亭而望思慘嬪媛以

延竚極容衛以盡時搖巾袂兮遠訣隔軒檻兮羣悲不復  
見兮迴御輦傷如何兮軫睿慈下蘭皋兮背芷陽旌悠悠  
兮野蒼蒼帶白花兮掩淚衣元帟兮斷腸當盛明兮共樂  
忽幽處兮獨傷去故廷兮日遠卽新宮兮夜長襍無文繡  
之飾器無珠貝之藏蓋自我之立制刑有國之大方嗚呼  
哀哉見送往之空歸歎終焉之如此方士神兮是與非甘  
泉畫兮疑復似遺音在於玉璽陳迹留於金甌獻萬壽兮  
無期存二南之餘美嗚呼哀哉

冊諡承天皇帝文

維大歷四年歲次己酉五月甲辰朔十二日乙卯皇帝遣  
使某官某乙持節冊命曰於戲稽於古典考於謚法咸藩  
升號禮或闕文爰自先朝特追尊諡蓋以長而教順豈私  
親而立制合之殊禮允屬元勳天下至公不可廢也爾故  
齊王某慶稟霄極氣陶元和孝彰純行忠表令德學師申  
穆文友徐陳闕東平之詔尤推達禮辨南陽之牘可謂知  
微靜而有謀敏亦能斷往以王室多故翠華西巡緬懷家  
邦首建大義上戴君父紹開中興會五原之兵車復四海  
之疆宇懋此微烈屈於流運愛深同氣痛結中腸頃雖衰

揚猶未僉允言念經啓之功載加飾終之數爰革舊典追  
崇大名是用冊王曰承天皇帝改置園邑從饗清廟贈以  
黃屋左纛龍旂九旒必備王者之儀用極送哀之禮庶榮  
厚宥有歉於懷嗚呼明靈尚服休命

故開府儀同三司上柱國贈太傅信王墓誌銘

昔周以仁厚之化睦於宗戚而武王之弟有國者三無官  
者五漢家雖皇子畢王而猶各守疆土不在京師我唐以  
孝理萬國周親並建至元宗儀制益重寵以留邸罷其歸  
藩大第連乎北宮高臺接乎雙闕今舊典不易特恩有加

所以廣親親之道洽骨肉之愛也王諱瑋字某元宗至道大聖大明孝皇帝第某子也母曰盧賢妃性與其貞氣合於純君親之際止於孝伯仲之間止於弟重以師傅之教資其賢淑之能實大雅之明哲高陽之恭懿也在開元時則帝子之寵紫殿溫清彤庭趨拜鳳姿秀發麟趾光華祚於海邦藩我王室在至德時則皇弟之貴駟馬之迎深於友愛三雍之獻益用親禮故詩有行葦勿踐所以昭忠厚也我皇既受命則叔父之尊安平望高淮南屬長其朝會也不在贊拜之列其宴私也特加壽觴之敬故書有分玉

展親所以美敦敘也至於綠池朱閣素月清風兄弟俱來  
子孫列侍偃蹇叢桂淹留芳草內饗分膳賜藥在庭杳然  
蓬瀛之外自適天人之樂斯非聖君尊寵之所尚賢王福  
履之所宜也以大歷九年十月庚午寢疾薨於上京春秋  
五十皇帝設位哀慟輟朝三日乃命中貴人襄事於內邸  
宗室屬籍哭於外次旣殯又詔司儀備物典策追諡命太  
傅光祿勳持節弔祭京兆尹監護喪事以其年十一月庚  
申葬於細柳原妃范陽盧氏祔焉禮也嗣子某郡王某官  
某乙等孝極其至喪如不勝故事藩王墓銘別詔論譔微



臣惶恐謹而誌之詞曰

玉璫黃流文祖受命金璽綠綬賢王分慶惟此賢王令德  
孝恭尊事天子翼翼邕邕天子敬異優其賜與大輅之旂  
元袞及黼如何不永誰察誰補葬我叔父於渭之傍曉下  
蘭坂夕臨芷陽百官會送五校啓行鼓吹悽咽郊原淒涼  
御津門外遠睇連岡懷德增慟迴輿更傷

奉天皇帝長子新平郡王墓誌銘

維永泰元年歲次乙巳二月十七日新平郡王薨於西京  
之內邸春秋四十一粵以其年五月七日遷窆於萬年縣

龜川鄉細柳原禮也王諱嚴字伯莊睿宗之曾孫元宗之  
孫奉天皇帝之長子也幼而溫良夙乃碩茂動皆執禮言  
必稱詩皇孫之中德行推美周邦右戚漢典開封代繼讓  
王之尊親承太伯之嗣先朝友愛奕葉追崇常佳南楚之  
風每翫西園之月仁者不壽遘疾而終皇上軫棠棣之悲  
懷雁行之慘輟朝震悼義切天倫驚遽云封龜占從吉俄  
辭舊邸言向佳城近灞陵之高原當細柳之吉地丹旌將  
引元甲啓行器備飾終禮有異等嗣子年在童幼執喪而  
哀詔葬之儀悲深先遠豐碑之寔詞在刊銘銘曰

文昭武穆天孫帝子好古推賢樂善歸美親承太伯業繼  
賢王漢屏斯重周卿有先人閱於水夜遷於壑長坂蘭摧  
小山桂落細柳之地灞陵之川泉扃一閉幽隧千年

信王第七子贈太常卿鄴國公墓誌銘

維永泰元年歲在乙巳四月壬戌朔十一日壬申有唐信  
王第七子儔終於西京之內邸春秋一十有八嗚呼哀哉  
詔贈太常卿粵翌日追封鄴國公以其年五月三十日葬  
於細柳原禮也公系承霄極慶襲藩維忠肅立身孝恭成  
性早聯華於武穆能有裕於文孫令範韶閒良才美秀敦

以友悌絕其交遊器適四科術通六藝宏此素尚暢於黃  
中宜其壽昌胡不秀實方固盤石遽凋本枝皇上義切友  
于情深悼往睦親軫念懷德增悲寵贈太常卿特優恒數  
仍錫苴茅之命用追棟蓼之榮日月有時卜云其吉送終  
灞岸載慟津門爰命侍臣碑刊貞石銘曰

元宗之孫信王之子性與聰悟天姿韶美始能趨拜卽異  
幼沖觀書魯壁習樂雍宮韞此器能方期光大一朝短折  
萬事冥昧皇恩寵贈友愛惟深幽局永閉長夜沈沈

華州刺史李公墓誌銘

天垂將星著在三象國有武柄寧於四方授鉞其難止戈  
斯重定封豕長蛇之孽致攀龍附鳳之功朱戟在門黃金  
橫帶命掌師旅化成公侯時有汧國公其人也公諱懷讓  
字某蓋漢將軍陵之後自五將失道家留隴山千年於茲  
因引貴族戎帳之下華風在焉奕葉相乘久雄朔北本枝  
必復終茂隴西公則成紀人也曾祖廣壯武將軍右武衛  
將軍祖忠雲麾將軍左金吾大將軍贈銀青光祿大夫太  
僕卿父俱定遠將軍右驍衛將軍贈銀青光祿大夫秦府  
都督積其勳望休有令名上將虎符延於三代列卿犀節

榮及九原後嗣其昌吾門益大公生於陝右少以勇聞重  
懸弧四方之事有長劒三軍之志去病籌略不學兵書賈  
逵兒童卽陳部伍人許封侯之相時歸拜將之望以安危  
爲已任取富貴於掌上一日千里豈徒然哉以良家子選  
羽林郎騎射絕倫材官入侍射熊舊館戲馬前臺百步應  
弦兩驂如舞便蕃左右趨奉階闈矜侯篤慎漢帝褒嘉屬  
皇室艱難王師巡狩侍執羈勒扈陪鸞輿節見時危捧六  
龍於岐下口陳天命從五馬於回中披荆榛而執殳冒風  
雨而持蓋中原行在實掌禁戎領護鉤陳典司環列出入

警蹕肅清扞擷羽衛甚嚴軍容益振夜合槍纍曉開旌門  
擁嘉氣於月營橫大風於天仗始自靈武至於扶風險阻  
屯蒙未嘗離上削平休泰終契興王從收軍師首列勳舊  
於是出鎮左輔建牙近關扼天下之樞走山東之盜三秦  
巨防萬里長城闢屯田於斥鹵強士馬於撫弊仁以理軍  
不聞半菽知能料敵豈在前茅兼牧人御衆之才得憂國  
奉公之禮竹符兼剖鈴閣長閑百城歌之政有經矣公始  
自一命驟更顯秩舉其大者不可備書歷臨彰府折衝射  
生供奉後以佐命功特授鎮國大將軍左羽林軍大將軍

知左神武軍事加特進兼鴻臚卿左神武軍大將軍封沂國公又加開府儀同三司充潼關鎮國軍使同華等州節度使華州刺史又兼御史中丞試殿中丞尋拜御史大夫檢校工部尚書並兼舊務雲從龍風從虎以雄毅之略遇聖明之主事與時並名與功偕位極文武權分中外勳書甲令象列雲臺大丈夫特達有如此者不知者壽謂之何哉廣德元年九月三日薨於華州軍府春秋若干天子聞之輟朝興歎特優命數寵贈司空詔發輅車卽日迎柩列辟卿士咸會喪焉贈賻祔含有加故事京兆尹監護內謁



者致以詞卽以其年十月四日陪葬建陵旌勳臣也將軍  
鹵簿司空法駕鉦車介士前後鼓吹觀者稱榮懦夫增氣  
百官臨弔畢集孔光之門五校送喪直至鄧宏之墓君臣  
之義厚莫重焉有子四人前光祿少卿林光等孝因天性  
哀過禮經克紹臧孫之後咸稱文氏之子史臣奉詔謹而  
誌之銘曰

有唐上將佐命通侯降神太白稟氣清秋弓落飛雁劒衝  
斗牛少年戴鶡上陌鳴騶繡衣朱褱越戟吳鉤入隨夜警  
出從春蒐運屬艱難謀參締構善行無迹大勇不鬪三輔

功名五原恩舊家榮鼎食廟列金奏翠羽在庭紫駟填廐  
寵私之盛誰出其右命所不與人之云亡萬乘震悼三軍  
悲涼謁者歸賙羣公會喪特陪元闕永祔黃腸禮優同等  
恩茂舊章碑題蟲篆用紀龍驤

滑州匡城縣令楊君墓誌銘

嘗讀東觀漢記至楊公四世太尉咸有清德泱泱乎鄒魯  
之風盡在丞相府矣百有餘年論道王室宜哉自後卿大  
夫洎二千石史不絕書以及於公公諱靈則字靈則宏農  
華陰人也高祖兵部尚書高都公尚希尚希生宜州別駕

丹川公壽旻壽旻生司農少卿徵徵生正議大夫漢州金堂縣令務道光昭先君之懿範其有後於關西乎公金堂第二子也幼以五經上第參卿博陵貳職鄆陽孫楚長揖桓譚不樂一錄州事會稽稱之再領縣尹自范至匡化行衛濮公易直子諒之心根於始矣加以好學止於蓋棺德行孝悌溫良博愛故宗族稱其仁朋友稱其信鄉黨稱其敬蓋君子之道歟及長從吏以寬服人官刑不行職事益辦及與之邑亦克用乂和氣充塞於百里頌聲洋洋乎至今其良吏之政歟赤紱在股下大夫事知止足之分有終

焉之志懸車告老飾巾待期浮雲身世脫屣軒冕追先生  
於彭澤繼徵士於太邱斯達者之流歟天寶十四年十二  
月十日寢疾於匡城縣歸休之私第春秋七十有三屬賊  
臣以山東叛乃公歿之明日也且告車來甚衆允子少殯  
故有闕在邑南鄙於堂西序啓足牖下土周於身十年於  
茲百戰之所折棟餘燼荒墳茂草柱下史能季武公之嘉  
客袞之姻友廣德元年夏四月本詣河外假道於匡訪郗  
公之舊邑歸戴侯於故里以其年十月一日合祔少陵原  
禮也夫人河東縣君薛氏婦道母儀六姻取則于我歸處

葛之覃兮及公而終木已拱矣子環在外不及主喪其誰  
尸之曰有三女無天何戴無地何履誓合泉壤感通神明  
終還營邱竟同防墓空悲蔡女之孝有媿潘郎之詞銘曰  
夫物芸芸各復其根事有必至理有固然少陵古原京兆  
新阡匡城夫人河東小君同居此地豈恨重泉誌於方石  
庸有賢人

欽定全唐文卷四百二十目錄

常袞 十一

咸陽縣丞郭君墓誌銘

贊善大夫李君墓誌銘

劔南節度判官崔君墓誌銘

御史大夫王公墓誌銘

太子賓客盧君墓誌銘

叔父故禮部員外郎墓誌銘

贈婕妤董氏墓誌銘

涼王妃張氏墓誌銘

欽定全唐文卷四百二十

常哀 十一

咸陽縣丞郭君墓誌銘

公諱某字某昔蔡邕敘有道之碑已詳姓氏司徒以廉直稱太守以仁明著祭酒之籌畫黃門之才理克祚於曾祖驃騎將軍光祿卿仁最祖汝州司馬茂禕父濟州刺史崇禮咸以文武孝謹傳於子孫公卽濟州府君之長子也高朗有識奉親孝事上敬睦於兄弟信於朋友好言王霸大略經術大義簡而無傲剛近於仁而能端本靜末仗雅居



正年十二有老成之量季父崇默不以常兒見遇謂必大  
吾門伏波之言不敢失墜仲容之器居然宏達尋以明經  
擢第歷洛州平恩縣尉左金吾衛兵曹參軍明恕貞恪清  
廉仁愛克施於政政有經矣故幕府三辟時稱得俊御史  
中丞李處古侍御史崔希逸節度使張嵩爰以將命之務  
諮焉公之佐廉問也旌別淑慝樹立風聲進厥賢良不仁  
者遠率由簡易希下按章從容以和大變其俗公之護戎  
事也善用文韜制其邊患本詩書之義府資德刑之戰器  
軍吏緩帶兵車稅鞅譚笑樽俎疆陲晏然凡所介貳皆有

卓絕之稱每歸功於上豈代帥受名而士君子多所推重  
方將萬里橫海一飛青雲三十有六年至於天命開元十  
八年四月十八日寢疾終於長安里第理命薄葬布車一  
乘而已不忘平生之儉以示後昆之訓惟公博識強辨尤  
好理論至於摺紳風教得失之間處正其義不以錙毫假  
物善與人交不改柯葉一時之俊千里應言分宅字孤謂  
之已任而特相友善者時則有若呂向梁涉庾狄履溫終  
以偉才良器綢繆省闈每一拜命未嘗不相謂曰使君不  
歿吾輩豈先處顯地其精鑒雅望有如此者夫人安定梁

氏執禮之坊有儀可則哀敬以事宗廟謙柔以和娣姒柏  
舟之誓年在幼沖諸姑始孩一生所寄送往過禮撫存以  
慈魚菽之祭以彰勤儉俎豆之訓不墜文儒時人謂之大  
家國史編於列女徽音淑行雅有餘芳開元十九年十二  
月二十四日終於雒陽私第元寢異室三紀於茲壬寅歲  
詔贈府君大理丞追封夫人安定郡太君德盛流光禮徽  
優典永泰二年十一月日合祔於金城縣太平原禮也嗣  
子大理丞縱侍御史絳夙遭閔凶不及詩禮之誨尚賴慈  
獎幼彰令聞白簡持憲丹筆詳刑忠信孝友合於純性悲

夫欲養而親不逮再仕而心不喜春秋窻步痛結寒泉月  
日有時禮尊同穴烝烝之慕有感人倫以哀夙有通家之  
好俾敘先君之德銘曰

世載忠厚有倬其道尊顯府君光昭祖考達識宏量汪汪  
浩浩五經紛綸精義入神勞我州縣汨我風塵不屑其志  
與時屈伸乃佐軍政戎荒底定乃登輜軒郡邑從令交則  
不黷久而益敬有才無年零落重泉遺孤改隧合祔終焉  
贊善大夫李君墓誌銘

太上立德我咎繇謀之太極至道我老氏明之施於子孫

金方集卷之三  
令聞長世盛衣冠於鄉族傳帶礪於侯社西涼有武昭之  
諡後魏有姑臧之封祚於我唐親則同姓門閥清顯冠於  
人倫婚姻所仰齊其大也朝會所推勝其長也君諱某字  
某其先隴西成紀人也曾祖元道皇朝秦王府十八學士  
給事中銀青光祿大夫常州刺史祖正基皇太子舍人父  
犯肅宗廟諱皇膳部郎中淄州刺史文章侍從給事黃門  
官品第三使符至五軍坊司其啓奏殿柱題其名氏並以  
博學偉才歷位中外藹然聲問揚於家邦公體元精之和  
得大雅之正入出孝弟而烝烝如也恭儉寡過學如不及

起詩書之廢疾通古今之訓注以五經高第冠名太學而  
四方諸儒多所質疑是時也元宗在上天下大同分王宗  
枝以崇藩屏高選僚友必極時俊非阮渾純粹鄭袤鑒識  
徐幹之恬澹寡欲匡衡之射策甲科則何以處畏慎之地  
當敬愛之禮故命公參陝王忠王義王棟王四府藩佐雖  
天人帝子不出於清禁而井賦田租必總於朱邸公守以  
廉介謹均節用用或有差終不奉教春秋匪懈夙夜在公  
行之維艱不易其操何止攀小山之桂虛望神仙對西園  
之月空疲讌賞而已開元中御史大夫李商隱按察東都

大明黜陟表公清白尤異特拜朝散大夫尋除右衛率府左郎將遷太子右贊善贊三善之德周禮其難將四率之府晉朝所重風流名士文武兼才輝映崇賢肅清屯騎素懷止足亟請歸閑至於暮年終不得謝嗚呼道不可屈身屈何傷以天寶十四載正月十七日終於東京崇政里之私第享年若干永泰元年二月皇帝以肅宗藩僚清節明著家丞秋實在先志而不忘中尉夜拜歎流年之已逝又以子列憲臣光我多士詔贈曹州刺史旌有德也夫人滎陽鄭氏明粹柔閑配於君子孝敬感於冬鯉勤儉彰於夜

螢先公而終其引蓋殯有子二人長曰榮終潤州司功次  
曰挺前監察御史繼夫人滎陽縣鄭氏輔佐之道宜其家  
人均養之德愛猶已出有男曰慶前越州參軍從夫啓南  
城之邑隨子述東征之賦江海悠然往歌來哭以大厯三  
年五月日葬我濟陰守於偃師縣東姑臧公之塋次蓋二  
夫人祔焉挺慶等性與純孝幼承訓獎烝烝孺慕合葬於  
防海變山飛銘石不泯詞曰

我之始祖自高邱兮繼有賢王霸涼州兮冕紱班然乃公  
侯兮周之姬姓漢之劉兮卓哉濟陰廣前修兮懷文抱質



金匱要略卷之二十一  
能剛柔兮羽陵遺簡誦如流兮介幘單衣從梁遊兮儲宮  
端士侍銅樓兮長水校尉鳴絳騶兮方期告賜得歸休兮  
誰謂生涯忽若浮兮先朝宮臣聖眷留兮追命藩守詔書  
優兮穀也食子難也收兮合祔黃腸千萬秋兮

劍南節度判官崔君墓誌銘

故人清河崔汪字巨源舉秀才校文尋佐戎衛遷廷尉評  
辟荆襄益三府春秋若干大厯四年月日遇疾終於成都  
官舍以己酉歲律中南呂庚辰之辰返葬於棲鳳原龜從  
也惟先德世勲焯敘前志祖仁堅父綱位不配才佐郡貳

邑而已公志經炳文義精格峻敦孝本義篤近周親定交  
後求忠告善道達則兼濟否則艱貞天寶之難覩萌晦跡  
族行導漾儉德全身陶融太和不嬰物累而辟書狎至傳  
駟旁午不暇棲伏俛而受命竟友於諸侯咨以書奏籌畫  
之事抗詞中病動不求合老將嘆喈大英雄張正色檢御  
革心畏憚從容儒服以靜邊荒夷險始終坦然一致初郭  
英乂鎮蜀政暴及禍公以嘗所辟用雖言之不行終全節  
守義遂與妻子居巖石之下不復斂袂於是府矣及相國  
衛公式是南邦旌禮賢士待以坐幄咨訪戎政議者謂翰

飛紫霄邈其遠矣志士方展國華中零哀哉蓋君子恥食  
浮於人不患無位故曰孔門不稱其官閥潁川尙慙於卿  
長公始以文顯中以道勝終以義全斯亦成名矣何必乘  
軒服冕方謂之達歟然以有王霸之略通質文之變不得  
與公卿大夫高議明庭鬱湮重泉知者悼惜旅櫬南下浮  
江阻寇夫人河東薛氏故水部郎中據之女也之死明誓  
崩戚感動潛舟夜風反樞湍險神明所護川后息波出於  
萬死之中克此九原之葬可謂貞烈孝婦軌儀壺教嗣子  
師周十一歲而孤危身過毀以余先君之舊見託銘述詞

曰

元和內融懿鑠孔純學滔泉源文鬱春雲儉德處難超然  
世氛卽戎雅歌偃息中軍參以天時合於兵機道行則安  
言發則危終保風節蜀人高之英靈沈埋旅櫬流離哀哀  
孝婦上訴蒼昊全柩巴江歸魂蜀道田橫舊曲季布餘軀  
一閉泉扃千秋蔓草

御史大夫王公墓誌銘

尊主直人則醜正者售禍權侔才忌則害能者構忤況位  
抗三府勢傾一時天下之事懸在掌握而剛腸立朝驚鶻

橫秋匡拂摩切姦邪是懲至使陰謀協比承間竊發曖昧  
摧辱加於大臣公諱鉉太原祁人也昔在元宗之盛外攘  
獫狁內立制度混一天下圖萬世安至於軍旅征伐府庫  
賜予聲明羽儀禮文憲則莫不懿鑠震曜龐鴻精備國用  
荐費闕於經入固宜有卓立大才統集其事公當此時以  
御史大夫領京兆尹佩帶使印十數焉黜幽陟明考察風  
俗地征國賦均輸平準天子六閑上林三官皆總制之未  
央前殿離宮下苑亦護作焉公以典訓經之文法緯之明  
察綱之廉平紀之其運也合變陰陽有以鼓其動其密也

至精鬼神不能窺其隙銜策害郡之黠鈴鍵多門之蠹裁  
兆物計億事沛有餘力矣動一節搖百支無所竄情矣故  
威檢轂下風清關右紅粟冰紈露積朽腐星精雪駟外廩  
填溢廣靈囿之百里奉祈年之萬春漢家水衡少府錢四  
十萬至是而過之俾我巍巍之朝四海雄富丕變於今公  
之力焉入則轉移大謀出則平決羣議天子垂拱於旒展  
宰臣高枕於廟堂時佐輔陳希烈忌公有宰相器憂在移  
奪又楊國忠與公權勢相傾事不兩立會有兇人邢宰陰  
聚姦黨於長安里舍中公以京輔都尉之卒逮捕悉擒詔

公與廷尉雜理而希烈洎國忠使法吏以牘背喻風旨於  
兇首引公愛弟鐸連坐公具表其狀請自拘於司敗上以  
罪不相及猶遣使慰原之而沈猜罔上者密白而下其書  
舊制大臣不對理陳冤天寶十一年四月十三日奉麓纓  
盤水北面拜跪而自裁妻子移隸宅於荒服嗚呼歷觀憂  
國愛君之臣忠信未達而左右所鞠按成其無狀之罪豈  
勝言也則王章鼂錯納忠漢朝衣冠僂於都市家屬徙於  
合浦古人有言曰刑罰出於身實難自他及之又何害也  
知我者其天平公始以茂才異行首於策詔凡四佐王官

之邑七領憲府之命一至殿省再遷臺郎大司空大司徒  
各一官族德政燕國公張說已敘於烈祖之碑夫人河東  
郡夫人薛氏存與其榮歿與其辱南北萬里流離十年飲  
恨餘生以存宗祀以大厯三年五月終於某所嗣子稱以  
不天之釁承覆巢之餘遷逐炎海幽冤霜露家未悔禍慈  
親凶歸主人之艱無稱之比永惟先君及難葬故有闕泣  
血忍死獲終哀誠以大厯五年三月二十一日合祔於中  
書皇考真宅之次相國許昌公嘗感府辟緬然懷舊改贈  
移寢周於庀喪有以見京兆知人之明許昌報德之厚哀



追敘遺烈亦門生表墓之禮銘曰

知者謀始不能知終明者察微昧於數窮任我以事效我以功吉凶悔吝生於其中無象無端茫茫蒙蒙伏恨黃墟孰問蒼穹小君從祔松柏來同

太子賓客盧君墓誌銘

上於大臣存歿優禮若忠厚篤敬勤勞有勲則錫以追命之冊延曜耿烈使之昭也大厯五年七月癸酉制故太子賓客盧正已可贈太子少保昔唐虞之際龍作納言咎繇弼刑其在周漢申伯于蕃南邦召公宅師東郊四皓輔翼

太子公嘗拜蜀郡長史成都尹劔南節度採訪等使大理卿刑部侍郎工部尚書東都留守太子賓客悉更乎明哲道德有馨香於前世之臣所任也才難不其然與公之作鎮也元宗自省方復雍以千官六宮南北軍之從留蜀殆二年矣而元元給輸費苦以公往典通義唐安二郡以理平遷通州刺史七州採訪防禦使課最遂止輦草詔而命之翼勤則黜幽化源以清則羣服庶尹執事之人不欺矣糺逖則攝懷亂略以寧則蠻夷君長異姓侯王從乂矣匡困資無繇賦既平則鰥寡孤獨廢疾者知所養矣旌德訓

農禮讓大行則三老孝悌鄉嗇夫知所勸矣公之議刑也  
先帝以天下初定禁網疎闊朝廷郡國廢革舊章於是草  
具科條制刑錄三卷以成後代法程無爽侮無佚罰矣公  
之居守也自胡馬入洛三川大殘長樂衛尉悉無官守中  
臺文書盡成灰燼而白晝大都之中剽吏奪金殺人橫道  
河南尹不能禁公以明恕清汙俗以淳和消沴氣禮新序  
舊士庶欣欣勤懋郎吏增嚴屯校日引月長四方人大和  
會翼翼之頌復覩於京師矣公之調護也儲后方建迪簡  
首僚以孝友閒博通明道術而保奉之夫大賢濟時而不

獨善大才當事而不辭難凡所任遇皆以國之艱急帝所  
親信而在厥服也始以經明四佐大邑三厯京掾五遷藩  
鎮三踐臺郎一處右轄再兼中憲以至於九卿元戎師賓  
居守小司寇冬官卿公字子寬本諱元裕以聲協上之尊  
稱時方大用優詔改錫焉曾祖君胃虢州參軍王公貞慶  
高尚不仕烈考履冰厯左補闕皆純古秉哲本經輔行德  
類賢續以之長世公含精於天性之道用晦於先物之智  
洞於學炳於文慈惠而厚汪汪洵洵未嘗簡彛不校其犯  
祿及疎遠家無長物在貴居陋樂而不更春秋之饗僅致

君昨賓客之位適容宴豆漿藿未厭於家食稂莠不充於  
馬餼及賜告得謝安車東歸天子老臣優游惠養早達元  
理迨茲逾深追贈之年二月旣望疾甚不弛冠帶安坐超  
然越二十一日甲申薨於東都循善里之私第壽七十有  
九夫人滎陽郡鄭氏禮儀風教鄉族宗焉澹忘物遷靜與  
貞會公一其好尚偕其貴壽亦古人之所難并也公薨之  
前祀八月七日終年六十有五權厝於新安縣龍澗原近  
先塋也將祔而定壙有伏泉改卜靳塢北里重岡之陽吉  
六年二月己酉乃葬是以緩嗣子前祕書郎兼監察御史

翰一身主祀泣盡形遺親友所憂言之感涕永惟先公夫人嘗有升堂之拜纂揚風烈非小子而誰銘曰

五侯九伯太公征之大輅龍旂桓公受之子子孫孫勿替引之前人光明我公昭之天子作師我公師之懿德顯猷永世則之

叔父故禮部員外郎墓誌銘

魯有先大夫其言立於世春秋謂之不朽儒有今世行之後世以成楷則君子之道不患時之不逢患其道之不顯故賢哲所以啓正宗教蓋風於人倫垂之無窮者矣賓客

諱無名字某河內溫人也曾祖渠州咸安令諱緒王父杞  
王司馬諱毅皇考慶王文學諱楚珪咸以清明粹和高爽  
顯融經術可以致公卿道德可以居師傅所不至者時之  
未會歟府君卽文學之第三子也伯仲叔季嗣世清德鴻  
藻振古休聲動時每至徵賢良舉秀才一門擅科半於天  
下旣冠進士擢第其年拔萃登科補益州新都尉開元十  
年舉文藻宏麗遂上陳皇王之盛下借周漢之諭稽以洪  
範九疇天人之統災變之異高言體大久而可驗如賈生  
之論漢也與孫逖同入第二等擢鄆縣尉宇文融寵幸用

事總領計簿地有不書登下之數者按而籍之乃明割利  
言辭義激切聞列於二府竟還其令忘已忤權風節獨立  
秩滿判入第三等自周隋已來選部率以書判取士海內  
之所稱服者二百年間數人而已又居其最焉復以常資  
授萬年尉戢鸞之資搏鷲之用得不夭其性而喪其真歟  
然亦筆無疑牘庭絕留訟昊天之薦禍於我家也廬於外  
壤負植封樹哀過而陽和變慘感達而猛獸來馴常伯卿  
尹四方高士麻弔於郊者匪朝夕而間焉莫不竦歎而希  
慕也及禮旣外除稱疾而不起朝廷方待以議郎博士辭



而求邑除潞州上黨令恬淡推誠薰然而化矣故老歌詠  
洋洋至今入拜起居舍人搜遺求實典冊大備撰開元注  
記三十卷藏在太史除屯田員外郎未幾轉禮部時天寶  
改元符瑞紛委郡國所獻月有千計公卿稱賀日奏數章  
總裁實難濬發皆麗元宗每賞異因命女史傳寫時省覽  
焉方將擢居紫垣專統大誥斯文旣喪成命中止以天寶  
三年十二月二十日薨於西京宣賜里之私第享年五十  
有六故事中書舍人非寵終之職上以心許久矣特贈此  
官朝之殊典也以明年正月權厝於少陵之東至上元廣

德之間以長子官在清近加贈工部侍郎太子賓客夫人  
博陵郡夫人崔氏徽閑有德明順合禮逮事舅姑嘗佐明  
祀歸我不永方春卽冥開元十七年終於京師年二十五  
窆於見子陵生長子侍御史著不幸早世繼夫人宏農縣  
太君楊氏大厯九年三月乙卯棄背於所封之邑其年七  
月己酉安厝於細柳原自廟見至於終堂三十九載宜家  
之懿範教子之明訓睦親之令德並載於已酉之銘生次  
子宏農縣令曾叔子大理評事普季子渭南縣尉魯永惟  
累世來遷僅二百年封域連岡昭穆相對禮不忘本時又

協吉以大厯十年十月庚午遷祔於宏農太君之塋博陵夫人同合焉夫敵已則不厭以子則咸貴若冢嗣旣殘於中年元室不歸於先寢豈成兄之志也所以同異均愛前後相從亦承家之順也孝禮則然詢義惟允君子韙之諸孤不天幼奪嚴訓志以苦立學以慈成克自修潔所承罔墜亦旣成人重集大釁思養於下不欲具生血盡而形遺者顧禮而終事也於戲天德於我叔父以扶濟儒元之道元精委其和太古合其淳德之厚也知至至之可與幾知終終之可與存恬然而虛寂然而通識之達也五禮之宗

六樂之奧致廣大而盡精微極高明而道中庸儒之博也  
包括羣有陶融象外燭日月之光華連星漢之昭回文之  
雄也若因親立愛則恭友過乎悌引進極乎慈奉先追孝  
則怵惕於時感齊明乎夙興靖於位而不以善矜儉於家  
而不以菲廢先哲之休風遐烈未嘗不蹈其域而冥其會  
也若處之於舜代則肩八元以論道升之於孔門則通四  
科而鄰聖而位止於上士教淪於衰俗豈蒼生之不幸耶  
元風之殆絕耶哀積釁少孤恭承憫覆躬誨無倦常至夜  
分性愚難移猶期日就外傳不得專也諸子不得視也獲

漸庶幾實賴慈獎恩未上報禍已先鍾遠慕何申有懷靡  
及所踐之職昔所彌綸顧瞻庭除出入哀懼微微小子夙  
夜上慚遷神甫臨省護摧絕哀以傳實不敢假詞銘曰

厥初茫茫輔軒致皇至我義信卽官於常開國長羅惟右  
將軍奄受高陽惟光祿勳印印天水諡曰貞道赫赫黃黃  
魏之元老乃生司徒啓佑周邦踐華卻齊實建麾幢戲上  
賜田自溫而遷迨茲十葉松柏芊芊穆處其後昭列其前  
哀詞具石永世不騫

贈婁好董氏墓誌銘

惟唐至德元年歲在癸卯十二月二日美人河內董氏終  
於閔鄉縣之別館春秋一十有八嗚呼哀哉美人蘭質幽  
閒茗華婉麗出自漢皋之曲降於巫峽之陽柳絮題詩椒  
花獻頌德行自成於天性藝能豈假於師資旣彰絕代之  
姿雅叶良家之選璫臺入寵金屋流芳映月幌而方娥上  
星樓而比婺恩多不恃顧重無矜讓以同車恭而避寢紫  
庭著美彤管旌賢屬綵仗巡遊花鈿侍從方執巾於上陌  
忽蒙被於離宮天道如何泉扃已矣聖上顧懷淑慎言念  
恩情悲遽天於先春歎長歸於永夜追加班女之秩式慰

衛兒之魂以某年月日葬於某原禮也乃命侍臣紀於貞石銘曰

二九之年麗容嫣然春風轉蕙秋水開蓮浣紗選貌納袂求賢承恩玉殿侍宴瓊筵光陰不借神道何偏椒房愛促蒿里悲纏婕妤寵贈女史芳傳丹鳳城外黑龍水邊嗚呼此地永閉神仙

涼王妃張氏墓誌銘

古之賢妃四德六行則在女史彤管記言納聘入於天宮儀刑光於帝闈休有懿範歿而可稱涼王妃張氏族茂清

河之原家承七葉之盛紱冕繼代勲華襲門曾祖守貞皇  
朝遊騎將軍左衛中郎將羅國公食實封三百戶職雄戴  
鵠績茂分茅祖光庭皇朝中散大夫衛尉少卿位亞八屯  
榮參九列父安仁皇朝正議大夫涇王府長史曳裾上邸  
託乘西園俱傳帶礪之封克承閼闔之後妃早習詩禮式  
遵教義令德令儀有要有倫旣當八月之期允叶良家之  
選天寶八載納爲涼王妃懿範徽音韶妍婉順恭勤朱邸  
儼恪丹霄友其琴瑟奉以家室瞻鴈池之閱水嗟駟隙之  
末光以廣德二年五月十三日終於上都之內邸春秋三



十七旋以其年十月六日遷窆於某原禮也涼王倚歎蘭  
臺傷神桂苑梧桐半落鸞鳳孤飛永逝不追嗒然增歎詔  
葬備禮哀榮飾終笳簫在辰旒旂啓路嗣子保定郡王仕  
攀號孺慕惟切蓼莪誌於幽泉銘以貞石慮佳城之白日  
識隴樹之青松銘曰

清河之邑兮地惟古貝毓粹華宗兮賢妃誕載柔順內積  
言容外彰謀茲淑德輔佐賢王芳年忽馳大暮何速積善  
虛應兮時長運促空餘懿範兮刻在貞玉